

որովհետեւ ռուս մատենագիր Շոպէն ենթադրում է թէ Հայերի, մանաւանդ Զուղայեցիների դէպի Պարսկաստան գաղթելու պատճառն ոչ թէ Շահաբբասի բռնութիւնն էր, այլ այն հանգամանքը, որ հնդկական նոր ծովային ճանապարհի գիւտով առեւտուրը դադարել էր եւ ուրիշ ուղղութիւն ստացել: Բայց ահա Շոպէնի գրութիւնը:

“Շատ նշաններից, հին աւանդութիւններից եւ տեղագրութիւնների հետազոտութիւնից պարզ երեւում է, որ հին ժամանակ Հայաստանում ծաղկած էր վաճառականութիւնը: Վաղուց դէն ձգած քաղաքների փլատակները՝ այն է Աստապատի, Արտաշատի, Վաղարշապատի, Գուինի, Անու եւ այլոց՝ բերում են այս եղբակացութեան: Բայց առանձնապէս հաստատում են այս միտքը Զուղան եւ Ագուլիսը, որոնք չունենալով մշակելու հող՝ կարող էին պահպանել բնակիչներին միմիայն վաճառականութեամբ:

“Զուղան 8000 գերդաստանով գտնւում էր քարաժայռերի մէջ, որոնք իրանց վայրենութեամբ սարսափեցնում են եւ որոնց վրայի ցցուած տները աւելի նման էին թռչունի բների, քան մարդկային կացարանների: Բայց նրանց հարստութիւնն այնքան գրաւեց Շահաբբասին, որ 1605 թուականին տեղափոխեց նրանց դէպի Սպահան: Ագուլիսը մշակելու հող չունենալով իւր 10.000 գերդաստան բնակիչներին պահպանում էր վաճառականութեամբ:

“Այդպիսի հետեւանքներ նոյն իսկ պատճառներից՝ նկատելի են ամենահին ժողովրդի մէջ Արեւելքում: Աւազուտ, անբերրի եւ անջրդի անապատները, որոնք ձգւում են Պարսից ծոցից՝ Սեւ եւ Միջերկրական ծովերի արանքում, շատ դարեր